


霍廷軍紀畧



建軍紀念



霆軍紀略卷三

銅梁陳昌世五編輯

門人

吳樹棠
王澤

全校字

庚申咸豐十年

正月鮑公會攻援賊大破之於小池驛克復太湖縣城遂復
潛山縣城

曾文正公自奏定四路規畧後於上年十一月帶步隊二
十營馬隊一營進駐宿松及見鮑公之軍調赴小池驛恐
太湖兵軍圍解大局可虞而迎擊之師尤慮腹背受敵因

於十二月二十日抽派宿松十營交副將朱品隆主事李
榕馳赴太湖與唐公訓方合軍駐於城之西北南三面尋
因鮑公營壘危急加撥護軍三千人並馬隊一營馳赴太
湖而抽唐公一軍赴援小池驛又調喻吉三凌蔭庭各營
赴羅溪河至是見鮑公餉道不通又抽調太湖七營派品
隆馳赴新倉以資援剿胡文忠公於上年十二月二十四
日以後飛調麻羅防兵赴新倉曾靖毅貞幹及趙克彰等
營赴太湖多隆阿公於二十九日督隊爲鮑公護運三十
日派參將楊朝林駐鮑公左營之壘移左營於中營養傷

至是月初六日唐公移營於鮑公及蔣公凝學兩軍之中
以資聯絡而通餉道多隆阿公亦派參將王可陞駐鮑公
左營之旁而令左營仍駐原壘馬步各軍忿與賊戰王可
陞之壘卽日而成唐公之壘未成而賊已進逼遂挫退三
營全陷於是合紮新倉鮑公之營復被賊圍裏鮑公督令
各營堅守不動於初十夜三更出隊擊退唐營舊壘之賊
多隆阿公於十二日復抽派所部兩營駐小池驛之南維
時文忠所調金國琛余際昌等軍共二十五營已陸續由
後山繞至水吼嶺仰天菴高橫嶺乘高拊賊之背而連次

接仗均未能大挫賊鋒以故陳玉成仍得專注小池驛十二日以後鮑公遂與各軍訂期夾擊密約小池驛三次排鎗爲號山內諸軍亦三次應之而皆爲風雨所阻賊亦乘陰霧四塞潛移其壘於羅山衝白沙畈一帶冀與太湖城賊勾通分股繞犯牽綴我軍我軍因卽雨雪之中得從容會商分撥各路以大圍包裹援賊復以伏兵橫截城賊二十五日黎明會齊鮑公親率五營空壁而出直薄賊營各壘之賊皆出救圍我軍數匝鮑公爲方陣施放連環鎗賊不敢逼多隆阿公令蔣軍橫截之唐軍尾抄之朱軍扼之

於右而自率馬步從中路殺入賊遂大敗擒斬數千是夜
鮑公與多隆阿公籌分東西中三路乘勝急攻之策二十
六日仍黎明出隊東路小池驛之賊分作四路抗拒約數
萬人而田壠中大股尤多鮑公親督鄭陽和蘇文彪余大
勝易昌煥黃慶段福陳由立宋國永劉車龍等由東路左
面擊田壠之賊朱希廣趙克彰繼之正鏖戰間唐公訓方
在東路之右見左面賊眾且悍而鮑公獨當其衝又撥四
營來助我軍勇氣益奮聲震山谷賊遂回奔時西路之軍
進攻羅山衝外賊壘而山賊齊出勢甚悍多隆阿公因督

中西兩路兵併力攻山衝外衝內兩面夾擊賊屍盈澗谷
唐公見鮑公之軍旣勝亦親率各營由東路右面斜刺而
來鮑公揮軍左衝右突賊益狂竄於是我軍合東西中三
路一齊追殺乘勝合攻賊壘值東南風緊火箭火彈觸處
卽燃頃刻賊棚賊館延燒七八里燎及山腰煙燄蔽天樹
焦山赤大小賊壘一百數十座頃刻胥平棚館數百無一
存者斃賊約七八千生擒數百奪獲軍械無數解散脅從
數萬人鮑公所部獨獲大礮二十四尊二千五百觔夷礮
一尊擡鎗小鎗千餘桿山內之軍金國琛余際昌等是日

依約由甌皮尖廣福寨高橫嶺三路齊進至銀硃塔王家
牌樓等處其時山外各軍正在得手賊沿山內竄而不虞
我軍又由山內突出奮力夾攻賊前後受敵亦遂敗竄殲
斃三千餘名太湖城內之賊因援賊大敗卽日宵遁小池
太湖餘賊竄入潛山城者萬數千人多隆阿公商令鮑公
及唐公等營搜捕各山匿賊而自率馬步同蔣公等乘賊
驚魂未定往攻潛山立克其城鮑公逐北至羅山衝又獲
大勝擒斬甚多官文恭公胡文忠公會文正公同奏言是
役也斃賊二萬餘人爲軍興以來僅見之大戰非鮑超以

三千餘人獨禦前敵傷亡千餘猶復血戰兼旬不卻一步
不失一壘則應援各師必有緩不濟急之勢鮑超勇犖堅
強力過兇鋒惟係二品大員未敢擅擬請獎等語并隨摺
保獎霆軍營官四人奉

上諭逆首陳玉成率黨力援太湖副都統多隆阿總兵鮑
超等親督各軍分路鏖戰殺賊約二萬餘名平賊壘百數
十座焚賊棚館數百處克復太湖縣城實足以寒賊膽而
快人心官文胡林翼曾國藩督軍進剿調度有方著先行
交部從優議敘總兵鮑超著賞加提督銜宋國永著俟補

副將後以總兵簡用蘇文彪著以副將儘先補用並賞給
確勇巴圖魯名號鄭陽和著以副將儘先補用並賞加總
兵銜段福著以副將儘先補用並賞給勳勇巴圖魯名號
陣亡員弁俱優卹如例其餘出力人員擇尤保獎當賊之
斷鮑公糧道也攻營益力鎗礮子密於兩點洞穿左軍旗
帳如蜂房時或傷鮑公左右鮑公神色自如鎮之以靜入
夜則兵營賊營俱停刁斗燈火無光狗逆之營去我軍晷
近一日賊乘夜運米以濟狗逆誤送至鮑公前營隔壕悄
問此英王營盤乎適鮑公正巡營命門者佯應之並授軍

士祕計而親出審視昏黑中數百囊擔充塞壕外如法抽
驗果皆米也命運入營中係累其負米役夫而將護運之
眞賊隨入隨殺之甫及半壕外賊疑懼不敢入將餘米轉
送至鮑公左營已而又送至右營俱悄問如前軍士亦如
前處之運米賊數百人無得脫者共得米三百二十餘石
鮑公正苦糧道不通圍困饑迫之中忽得此意外接濟眾
以爲天授而士心益固矣方送米賊之隔壕悄問也適後
營守者報賊曾乞降請鮑公親往開示鮑公命營官某詭
稱主將代往而自赴前營應付收米事及某與降賊語甫

數言賊曰若非鮑公也氣魄不類必鮑公親來始輸情收
米計定鮑公乃親至後營立壘上呼降賊與語降賊伏鹿
角外一聞其聲卽驚曰此眞鮑公矣鮑公曰汝何降爲曰
久服公威信欲降無緣今賊且就殲不降何待鮑公曰賊
數共若干曰五十萬鮑公曰以吾觀之不過二十萬耳汝
知吾兵若干曰五營三千餘人耳鮑公曰眾寡懸殊謂賊
必滅何也曰昨者除夕賊聞公營爆竹聲疑公出隊來劫
各賊營竟夕驚惶天明始定賊雖多畏公如虎破滅可立
而待又曰我有眾三千欲盡降則恐以聲勢貽誤鮑公曰

降否聽汝人數多寡亦聽汝越日果以三百餘人來降正月
初十日文忠致密函於鮑公曰如力實不能支尙欲全
軍以待大舉救得人才不怕賊子不死於老弟之手此事
暫不可宣萬一到緊急無可如何之時則新倉荆橋均是
退步有過兄一人任之兄爲管理軍事之人以保全軍旅
爲主斷不忍諉過於人也鮑公覆書云狗逆雖悍技只此
耳因大雨兼旬未能出戰遂使賊得暫延殘喘三五日內
天色晴霽保爲公破之何事先自倉皇預籌退步耶文忠
壯其言援賊未至以前文忠致書曾文正公有云此間不

憂唐蔣之軍而深慮春霆愛春霆也春霆似孟施舍詢以
軍事斷不告饒加以激厲轉成憤氣宜委曲而暗中保全
之若援賊眞從太湖一路而來則必先全春霆一軍乃能
得手是時多隆阿公尙未移鮑公之營於小池驛而文忠
已慮之如此及移營被圍致多隆阿公書云霆營當延山
逼壘日夜攻擊之衝其苦況可危其愚忠可念左營營官
鄭陽和敢戰之將受傷至於再至於三機智則未樸勇則
眞又致鮑公書云老弟孤忠貫日月義氣薄雲霄可感可
敬老弟與鄭陽和應特疏薦舉卽各營將士應均加獎也

兄已面託義渠幫助老弟此次援賊必須盡殺多殺殺退
之後當使老弟獨領一軍獨當一面也又云左營受七晝
夜鎗礮之衝其堅苦屹立勢如撼山尤可想見其營帳軍
裝已飭武穴轉運局趕緊解送即可專勇迎提又函云唐
軍挫退無刻不懷念弟營每得弟一函展視再三而私心
稍慰如懸旌在空風過略定鎗礮對擊山坳賊不敢近深
以爲慰此後約會出隊切勿專顧賊壘酣戰而前須防村
館悍賊沿山四出我能以抄後見功則賊無所施其技矣
及聞鮑公餉道有失連與別將書云霆營餉道梗塞心以

爲危或山內各軍速出高橫嶺并力破賊尙可救也又云連日以鮑軍孤懸爲慮幾乎寢食均廢又云鮑營甚苦羅溪河等處暫不必分心急謀大捷以救春霆又云救鮑打狗進兵宜速宜併力後致曾文正公書云昨日尙深以鮑軍爲慮夜間得唐鮑來信餉道尙通卽夜躍起致鮑公書云十三夜三更出隊擊退唐營舊壘之賊想見調度有方撫循得法士卒忠義感憤之氣愈苦愈堅鄙人何德不知所報願弟代致私忱爲幸兄已備米一千石錢二千串作賞交武穴吉水溝局員矣又致浙撫羅公遵殿書云小池